

分支統譜叙

自古宗支分徙久而不迷所自者重有譜焉我史氏發源京兆開族溧陽瓜綿陟延幾遍海內然而人自爲支家自爲譜支盛則譜修支衰則譜闕求其各溯淵源罔或中斷往往不可得間嘗讀玉陽公分徙錄與璞菴公分支考竊嘆其用心之深且厚也蓋舉各支而統爲一編則事煩舉各支初徙之一人而輯爲一帙則事簡知初徙卽知前所由

來與後所從出合離萃渙厥道於是乎在今曠隔
百有餘載而子姓蕃衍輾轉遷徙者又不知凡幾
增修加訂此不容緩之候矣嘉慶丁卯夏達抵楚
南柘溪族叔藩署適楚南支建祠請額以其所纂
家乘進其中系出溧明者約十餘支廼益見吾族
星分直難臆測因備言考徵分徙事族叔稱善卽
出譜錄合編爲藍本而以向所訪得者附之挈領
提綱芟煩就簡或理其緒而分或比其類而合不

數十晝夜遂脫稿時吳江俞名善襄溧陽族弟名
錫祐偶聚會省各舉所知宗派依次編入較舊譜
爲加詳焉族叔旣鑒定捐廉付梓並頒諸族尙與
同志宗賢共爲蒐羅一同接續務叙其初徙何朝
轉遷爲何地注明祖系並及後人登通顯與有懿
行可傳者惠寄浙紹宗祠俾得沿流溯源次第增
補以繼前人之緒而昭一本之親古云天下無二
史卽謂天下無二譜也可是爲叙

時

嘉慶十二年歲次丁卯小春月

穀旦

五十五世孫紹興達善謹識